

10-04-2019

UPA2019/125/198

**Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut tamarmik pilersaarusiunneqartarnissaat qanoq qulakkeerneqarsinnaanersoq kingusinnerpaamik ulloq 1. november 2019-mi qulaajaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatumani nunatsinni kræfteqarlutik toqusartut ikilisinneqarnissaannik anguniagaqarnerup anguneqarnissaa siunertarinelarluni.**

(Inatsisartunut ilaasortat, Stine Egede aamma Sofia Geisler, Inuit Ataqtigiit)

**Nappaassuarmik Kræftimik eqqugaasimalluni paasineqarnermiit sivisunerpaamik ullut 30-vit qaangiutsinnagit katsorsarneqarnerup aallartereersimasarnissaanik qularnaarussisoqartalernissaa qanoq iliorluni piviusunngortinneqarsinnaanersoq pillugu misissueqqissaarinerimik ukioq 2019 naatsinnagu Naalakkersuisut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jess Svane, Siumut)

Inuit Ataqtigiit sinnerlugit Inatsisartuni ilaasortat Stine Egede, Sofia Geisler aammalu Siumut sinnerlugu Inatsisartuni ilaasortaq Jess Svane siunnersuutaat ataatsimoortinneqarsimasut imaattumik oqaaseqarfigissuagut.

Nunatsinni ajoraluaqisumik kræftimik eqqugaasartut toqquteqartartullu nunani avannarlermioqatitsinnut sanilliullugit amerlasoorujussuupput. Tamanna nunatsinni ilaqtariippassuarnut tamatsinnut alianaqisumik eqquisarpoq.

Toqquteqartartut amerlanerinit ilaatigut tunngavilersuutigineqarpoq sivisuallaamik utaqqisinneqartarnerat. Tunngavilersuutilli arlalissuusinnaasut qularnanngilaq tassami nunatsinni isortoorsuarmi najugaqarpugut, ilinniarsimasut killeqartorujussuit pigivagut ingammik nunaqarfinni. Aammattaaq siusinnerusukkut peqqinnissaqarfimmiik tunngavilersuutigineqarnikuuvoq kalaallit kræftilertartut amerlasuut toqqutigisartagaat nunani avannarlermiunut sanilliullugit allaanerukkajuttut, kalaallit katsorsaruminaannerusumi kræfteqalertarnerat tunngavigalugu.

Sunali tamarmi ajortuinnaangilaq, nunaqqatitta ilai nunarput qimangikkaluarlugu kræftimik nappaatiminnik katsorsarneqarsinnaalernikuupput nunatsinnili suliarineqarsinnaanngitsut Qallunaat Nunaanni suliarineqartarlutik. Aammattaaq pilattaasarfik nutaaq sananeqarnikuuvoq atortorissaarutillu nutaat nappaatip suussusersineqarnissaanut iluaqutaasinnaasut pigilernikuuagut.

Qujanartumik Kræfti pillugu pilersaarummi anguniakkat ukkatarineqarput, napparsimasup katsorsarneqarnissaanut pilersaarusiunneqartarpoq sapinngisamillu piaarnerpaamik ikiorniarneqartarluni. Uanili siunnersuuteqartut anguniagaat tassalu katsorsarneqarnissamut ullunik sivisunerpaaffissaliinissaq misissuinissarlu Naalakkersuisunit allannguutissatut siunnersuut Siumumiit iluarisimaarparput. Allannguutissatut siunnersuummi siunnersuutigineqartut tamarmik anguniarneqassammata.

Siumumiik taamatut oqaaseqarluta Naalakkersuisut allannguutissatut siunnersuutaat akuersaarlugu ataatsimiititaliamut susassaqartumut ingerlateqqinneqarnissaa innersuupparput.

Doris J. Jensen, Siumut